

神農本草經

冊一

一

二

三

四

五

六

七

八

九

十

十一

十二

十三

十四

十五

神農本草經

四部備要

子部

上海中華書局據問經堂

本校刊

桐鄉 陸費逵 總勤

杭縣 高時顯 輯校

杭縣 丁輔之 監造

本艸經序

記曰醫不三世不服其藥鄭康成曰慎物齊也孔冲遠引舊說云三世者一曰黃帝鍼灸二曰神農本艸三曰素女脈訣康成周禮注亦曰五藥艸木蟲石穀也其治合之齊則存乎神農子儀之術是禮記注所謂慎物齊者猶言治合之齊指本艸諸書而言也冲遠既引舊說復疑其非鄭義過矣漢書引本艸方術而藝文志闕載賈公彥引中經簿有子儀本艸經一卷不言出於神農至隋經籍志始載神農本艸經三卷與今分上中下三品者相合當屬漢以來舊本隋志又載雷公本艸集注四卷蔡邕本艸七卷今俱不傳自別錄以後累有損益升降隨時條記或傳合本文不相別白據陸元朗經典釋文所引則經文與名

醫所附益者合併爲一其來舊矣孫君伯淵偕其從子因大觀本艸黑白字書釐正神農本經三卷又据太平御覽引經云生山谷生川澤者定爲本文其有預章朱崖常山奉高郡縣名者定爲後人羸入釋本艸者以吳普本爲最古散見於諸書徵引者綴集之以補大觀本所未備疏通古義系以攷證非澹雅之才沈鬱之思未易爲此也古者協陰陽之和宣羸縮之節凡夫含聲負氣以及倒生旁達蠓飛螻動之倫胥盡其性遇物能名以達於利用生生之具儒者宜致思焉淮南王書曰地黄主屬骨而甘艸主生肉之藥也又曰大戟去水亭歷愈張用之不節乃反爲病論衡曰治風用風治熱用熱治邊用蜜丹潛夫論曰治疾當真人參反得支羅服當得麥門冬反蒸橫麥

已而不識真合而服之病以瀆劇斯皆神農之緒言
惟其贍涉者博故引類比方悉符藥論後儒或忽爲
方技家言漁獵所及又是末師而非往古甚至經典
所載鳥獸艸木亦輾轉而昧其名不已眞乎後漢書
華佗傳吳普從佗學依準佗療多所全濟佗以五禽
之戲別傳又載魏明帝使普爲禽戲普以其法語諸
醫疑其方術相傳別有奇文異數今觀普所釋本艸
則神農黃帝岐伯雷公桐君醫和扁鵲以及後代名
醫之說靡不賅載則其多所全濟由於稽考之勤比
驗之密而非必別有其奇文異數信乎非讀三世書
者不可服其藥也世俗所傳黃帝神農扁鵲之書多
爲後人竄易余願得夫閱覽博物者爲之是正也因
孫君伯仲校定本艸而發其端至其書考證精密則

讀者宜自得之餘姚邵晉涵序

本艸經序

神農本艸經三卷所傳白字書見大觀本艸按嘉祐補注序云所謂神農本經者以朱字名醫因神農舊條而有增補者以墨字間於朱字開寶重定序云舊經三卷世所流傳各醫別錄互爲編纂至梁貞白先生陶弘景乃以別錄參其本經朱墨雜書時謂明白据此則宋所傳黑白字書實陶弘景手書之本自梁以前神農黃帝岐伯雷公扁鵲各有成書魏吳普見之故其說藥性主治各家殊異後人纂爲一書然猶有旁注或朱墨字之別本經之文以是不亂舊說本艸之名僅見漢書平帝紀及樓護傳予按藝文志有神農黃帝食藥七卷今本譌爲食禁賈公彥周禮醫師疏引其文正作食藥宋人不考遂疑本艸非七略

中書賈公彥引中經簿又有子儀本艸經一卷疑亦此也梁七錄有神農本艸三卷其卷數不同者古今分合之異神農之世書契未作說者以此疑經如皇甫謐言則知四卷成於黃帝陶弘景云軒轅已前文字未傳藥性所主當以識識相因至於桐雷乃著在於編簡此書當與素問同類其言良是且藝文志農兵五行雜占經方神僊諸家俱有神農書大抵述作有本其傳非妄是以博物志云太古書今見存有神農經春秋傳注賈逵以三墳爲三皇之書神農預其列史記言秦始皇不去醫藥卜筮之書則此經幸與周易並存顏之推家訓乃云本艸神農所述而有豫章朱崖趙國常山奉高真定臨淄馮翊等郡縣名出諸藥物皆由後人所羸非本文陶弘景亦云所出郡

縣本屬後人所附益經但云生山谷生川澤耳洪範以康寧爲福雅頌稱壽考萬年又何疑于久服輕身延年爲後世方士之說者大抵儒者之嗜學如醫然淵源其脈也覆審其珍視也辨邪正定是非則溫寒平熱之介也觀察方聞綴學以鴻儒名海內求其著述者如金膏水碧之珍鳳卿好博聞妍丹吮墨日以儒爲事則上溯之羲皇以前數千年如一日非嗜之專且久而能然耶顧吾獨怪是編中無所謂治書癖者安得起神農而一問之嘉慶四年太歲在己未冬十月望日宣城張炯譔於瞻園之灌朮莊

本艸經序

儒者不必以醫名而知醫之理則莫過於儒者春秋時和與緩神于醫者也其通周易辨皿蟲之義醫也而實儒也世之言醫者必首推神農然使神農非與太乙遊則其傳不正非作赭鞭鉤鋤巡五岳四瀆則其識不廣非以土地所生萬千類驗其能治與否則其業不神傳不正識不廣業不神雖日取玉石艸木禽獸蟲魚米穀之屬歷試之親嘗之亦僅與商賈市販等耳於醫乎何與吾故曰神農千古之大儒也考崇文總目載食品一卷五臟論一卷皆繫之神農其本久不傳傳之者神農本艸經耳而亦無專本唐審元哀輯之書錄解題謂之大觀本艸讀書志謂之證類本艸厥後繆希雍有疏盧之頤有乘雅半偈皆以

本經爲之主然或參以臆說或益以衍斷解愈紛義愈晦未有考核精審卓然有所發明者則證古難證古而折衷于至是爲尤難孫淵如觀察偕其從子鳳卿輯神農本艸經三卷于吳普名醫外益以說文爾雅廣雅淮南子抱樸子諸書不列古方不論脈證而古聖殷殷治世之意燦然如列眉孔子曰多識于鳥獸艸木之名又曰致知在格物則是書也非徒醫家之書而實儒家之書也其遠勝于希雍之頤諸人也固宜或以本艸之名始見漢書平帝紀樓護傳幾有疑于本艸經者然神農始嘗百艸始有醫藥見于三皇紀矣因三百六十五種注釋爲七卷見于陶隱居別錄矣增一百十四種廣爲二十卷唐本艸宗之增一百三十三種孟昶復加釐定蜀本艸又宗之至郡

縣乃後漢時制疑仲景元化等所記按薛綜注張衡賦引本艸經太一禹餘糧一名石腦生山谷是古本無郡縣名太平御覽引經上云生山谷或川澤下云生某山某郡明生山谷本經文也其下郡縣名醫所益今大觀本俱作黑字或合其文云某山川谷某郡川澤恐傳寫之誤古本不若此仲景元化後有吳普李當之皆修此經當之書世少行用魏志華佗傳言普從佗學隋經籍志稱吳普本艸梁有六卷嘉祐本艸云普修神農本艸成四百四十一種唐經籍志尙存六卷今廣內不復存惟諸書多見引據其說藥性寒溫五味最爲詳悉是普書宋時已佚今其文惟見掌禹錫所引藝文類聚初學記後漢書注事類賦諸書太平御覽引据尤多足補大觀所缺重是別錄前

書因采其文附於本經亦略備矣其普所稱有神農說者卽是本經大觀或誤作黑字亦据增其藥物或數浮于三百六十五種由後人以意分合難以定之其藥名有禹餘糧王不留行徐長卿鬼督郵之屬不類太古時文按字書以禹爲蟲不必夏禹其餘名號或係後人所增或聲音傳述改古舊稱所致又經有云宜酒漬者或以酒非神農時物然本艸衍義已据素問首言以妄爲常以酒爲漿謂酒自黃帝始又按文選注引博物志亦云杜康作酒王著與杜康絕交書曰康字仲寧或云黃帝時人則俱不得疑經矣孔子曰述而不作信而好古又云多識於鳥獸艸木之名今儒家拘泥耳目未能及遠不覩醫經本艸之書方家循守俗書不察古本藥性異同之說又見明李

時珍作本艸綱目其名已愚僅取大觀本割裂舊文
妄加增駁迷誤後學予與家鳳卿集成是書庶以輔
翼完經啟蒙方伎略以所知加之考證本經云上藥
本上經中藥本中經下藥本下經是古以玉石艸木
等上中下品分卷而序錄別爲一卷陶序朱書云本
艸經卷上注云序藥性之源本論病名之形診卷中
云玉石艸木三品卷下云蟲獸果菜米合三品此名
醫所改今依古爲次又帝王世紀及陶序稱四卷者
掌禹錫云按舊本亦作四卷韓保昇又云神農本艸
上中下并序錄合四卷若此則三四之異以有序錄
則抱朴子養生要略太平御覽所引神農經或云問
于太乙子或引太乙子云云皆經所無或亦在序錄
中後人節去之耳至其經文或以痒爲癢創爲瘡淡

爲痰注爲蛀沙爲砂兔爲菟之類皆由傳寫之誤据
古訂正勿嫌驚俗也其辨析物類引据諸書本之毛
詩爾雅說文方言廣雅誰子雜家則鳳卿增補之力
居多云陽湖孫星衍撰

新刻神農本艸經序

著本艸者代有明哲矣而求道者必推本於神農以爲神聖之至誠盡性其興物以前民者義至精而用至大也歷三代之世以迄秦漢守其書而傳習之蓋無敢違其教者自陶貞白雜入明醫別錄朱墨分書其書無專本矣至宋以降朱墨互淆其書無真本矣紛紜散亂千有餘歲好古者乃欲一一收拾以復其舊亦難矣哉故靈胎徐氏有本艸百種錄修園陳氏有本艸經讀各於經旨有所發明不愧述者要止體厥功能以便世用而於三品之全物卒闕焉而無聞久之乃得顧氏輯本復於同郡石埭徐氏借得孫氏輯本二書皆以考核爲能者也而於其中不能無疑焉孫氏之書比於顧氏詳且博矣其所引据於性味

功用一無所發蓋孫氏本非知醫者此無足怪乃於
名物形狀亦徒羅列富有莫正是非如水萍則藻蘋
並列柳華則檉杞同稱如此之類未可殫舉然而備
錄前文以待來哲之論定焉猶曰賢者至虛至慎闕
所不知之義也若夫橘柚用其實也非用其木青囊
爲巨勝苗巨勝九穀長其可實穀而苗艸耶二種出
入嫌於妄作矣尤異者孫顧二書同出大觀而三品
互殊幾於十二顧氏詆孫不考本經目錄故三品種
數顯與名例相違夫本經目錄載在李氏綱目第二
卷昭昭者也孫氏之輯此書不可謂不勤者矣獨于
此忽焉而不一寓目耶豈謂本經久無真本安所得
其目錄李氏所述不足據耶然而名例相違又何也
夫數典者經生之空談而無與於醫之實用者也天

下無無用之物而患無用物之人物無不樂效用於人而人每至於負物是書也苟不求所以用之卽各物品數盡如神農之舊而何所濟於世古聖垂教之深心歷代賢士表章之盛意其在是耶用藥一用兵也善用則攻卽爲補不善用則補亦殺人世人於兵皆知不可妄動獨於醫藥往往輕於嘗試抑獨何哉學海慮古籍之湮也亟爲刊佈而敘其梗概如此以見舍顧而從孫者亦取徵引之富瞻耳至於名象之是非功用之變化在善讀者之自得之矣時光緒辛卯秋仲建德周學海澂之記

本艸經卷一

吳普等述

孫星衍
馮翼同輯

上經

上藥一百二十種為君主養命以應天無毒多服久服不傷人欲輕身益氣不老延年者本上經

丹沙

雲母

玉泉

石鍾乳

涅石

消石

朴消

滑石

石膽

空青

曾青

禹餘糧

太乙餘糧

白石英

紫石英

五色石脂

白青

扁青

右玉石八
品一十上

種舊
同

昌蒲

鞠華

人參

天門冬

甘草

乾地黄

朮

兔絲子

牛膝

充蔚子

女萎

防葵

茈葫

麥門冬

獨活

車前子

木香

署豫

薏苡仁

澤瀉

遠志

龍膽

細辛

石斛

巴戟天

白英

白蒿

赤箭

奄閭子

析蓂子

薯蕷

赤黑青白黃紫芝

卷柏

藍寶

芎藭

蘼蕪

黃連

絡石

蒺藜子

黃耆

肉松容

防風

蒲黃

香蒲

續斷

漏蘆

營實

天名精

決明子

丹參

茜根

飛廉

五味子

旋華

蘭艸

蛇牀子

地膚子

景天

因陳 杜若 沙參 白兔藿

徐長卿 石龍芻 薇銜 雲實

王不留行 升麻 青蘘

姑活 別羈 屈艸 淮木 右艸上品
七十三種

舊七十
二種

牡桂 茵桂 松脂 槐實

枸杞 柏實 伏苓 榆皮

酸棗 蘗木 乾漆 五加皮

蔓荆實 辛夷 桑上寄生

杜仲 女貞實 木蘭 蕤核

橘柚 右木上品
二十九種

髮髮 右人
一種

龍骨 麝香 牛黃 熊脂

白膠

阿膠

右獸上品
六種舊同

丹雄雞

鴈肪

右禽上品
二種舊同

石蜜

蜂子

蜜臘

牡蠣

龜甲

桑螵蛸

海蛤

文蛤

蠶魚

鯉魚膽

右蟲魚上品
一十種舊同

藹實莖

大棗

葡萄

蓬蒿

雞頭實

右果上品
五種舊六種

胡麻

麻蕒

右米穀上品
二種舊三種

冬葵子

苧實

瓜蒂

瓜子

苦菜

右菜上品
五種舊同

丹沙味甘微寒主身體五藏百病養精神安魂魄益

氣明目殺精魅邪惡鬼久服通神明不老能化為汞

生山谷

太平御覽引多有生山谷三字大觀本作生
符陵山谷俱作黑字考山谷是經文後人

加郡縣耳宜改爲白字而以郡縣爲黑字下皆仿此

吳普本艸曰丹沙神農甘黃帝苦有毒扁鵲苦李氏大寒或生武陵採無時能化汞成水銀畏磁石

惡鹹水

太平御覽

名醫曰作末名真朱光色如雲母可折者良生符陵山谷採無時

案說文云丹巴越之赤石也丹象丹井、象丹形古文作日亦作彤沙水散石也瀕丹沙所化爲水銀也管子地數篇云山上有丹沙者其下有銑金淮南子地形訓云赤天七百歲生赤丹赤丹七百歲生赤瀕高誘云赤丹丹沙也山海經云丹粟粟沙音之緩急也沙舊作砂非汞卽瀕省文列僊傳云赤斧能作水瀕鍊丹與消石服之按金石之藥

古人云久服輕身延年者謂當避穀絕人道或服數十年乃効耳今人和肉食服之遂多相反轉以成疾不可疑古書之虛誣

雲母味甘平主身皮死肌中風寒熱如在車船上除邪氣安五藏益子精明日久服輕身延年一名雲珠一名雲華一名雲英一名雲液一名雲沙一名磷石生山谷

名醫曰生太山齊廬山及琅邪北定山石閒二月

采

此錄名醫說者卽是仲景元化及普所說但後人合之無從別耳亦以補普書不備也

案列僊傳云方回鍊食雲母抱朴子僊藥篇云雲母有五種五色並具而多青者名雲英宜以春服之五色並具而多赤者名雲珠宜以夏服之五色並具而多白者名雲液宜以秋服之五色並具而

多黑者名雲母宜以冬服之但有青黃二色者名雲沙宜以季夏服之晶晶純白名磷石可以四時長服之也李善文選注引異物志雲母一名雲精入地萬歲不朽說文無磷字玉篇云磷薄也雲母之別名

玉泉味甘平主五藏百病柔筋強骨安魂魄長肌肉

益氣久服耐寒暑御覽引耐字多作能古通不飢渴不老神僊人

臨死服五斤死三年色不變一名玉杺御覽引作玉濃初學記引

云玉桃服之長生不死御覽又引云玉桃服之長生不死若不得早服之臨死日服之其尸畢天地不朽

則杺疑當作桃生山谷

吳晉曰玉泉一名玉屑神農岐伯雷公甘李氏平

畏款冬惡青竹御覽白玉杺如白頭公同上專類賦引云白玉體

如白首翁

案周禮玉府王齋則供食玉鄭云玉是陽精之純者食之以禦水氣鄭司農云王齋當食玉屑抱朴子僊藥篇云玉可以烏米酒及地榆酒化之為水亦可以蔥漿消之為粉亦可餌以為丸亦可燒以為粉服之一年以上入水不露入火不灼刃之不傷百毒不犯也不可用已成之器傷人無益當得璞玉乃可用也得于闐國白玉尤善其次有南陽徐善亭部界山中玉及日南盧容水中玉亦佳

石鍾乳味甘温主欬逆上氣明目益精安五藏通百

節利九竅下乳汁御覽引云一名留公乳大觀本一作一名公乳黑字生山谷

吳普曰鍾乳一名虛中神農辛桐君黃帝醫和甘

扁鵲甘無毒御覽引云李氏大寒生山谷御覽引云陰處岸

下溜汁成御覽引作溜如乳汁黃白色空中相通

二月三月采陰乾

凡吳普本艸掌禹錫所引者不復注惟注其出御覽諸書者

名醫曰一名公乳一名蘆石一名夏石生少室及

太山采無時

案范子計然云石鍾乳出武都黃白者善

凡引計然多出

事文類聚文選注御覽及大觀本艸列僊傳云叩疏煮石髓而服之

謂之石鍾乳鍾當為湏說文云乳汁也鍾假音字

涅石

舊作磐石据郭璞注山海經引作涅石

味酸寒主寒熱洩利白沃

陰蝕惡創目痛堅筋骨齒鍊餌服之輕身不老增年

一名羽硯生山谷

吳普曰礬石一名羽硯一名羽澤神農歧伯酸扁

鵲鹹雷公酸無毒生河西或隴西或武都石門采

無時岐伯久服傷人骨

御覽

名醫曰一名羽澤生河西及隴西武都石門采無

時

案說文無礬字玉篇云礬石也硯礬石也西山經云女牀之山其陰多涅石郭璞云即礬石也楚人名為涅石秦名為羽涅也本艸經亦名曰涅石也范子計然云礬石出武都淮南子倣真訓云以涅染緇高誘云涅礬石也舊涅石作礬石羽涅作羽硯非

消石味苦寒主五藏積熱胃張閉滌去蓄結飲食推陳致新除邪氣鍊之如膏久服輕身御覽引云一名芒硝大觀本作

黑字生山谷

吳普曰消石神農苦扁鵲甘

凡出掌禹錫所引亦見御覽者不箸所出

名醫曰一名芒消生益州及武都隴西西羌采無

時

案范子計然云硝石出隴道据名醫一名芒消又別出芒消條非北山經云京山有陰有元礪疑礪卽消異文

朴消味苦寒主百病除寒熱邪氣逐六府積聚結固留癖能化七十二種石鍊餌服之輕身神僊生山谷吳普曰朴硝石神農岐伯雷公無毒生益州或山陰入土千歲不變鍊之不成不可服

御覽

名醫曰一名消石朴生益州有鹽水之陽采無時案說文云朴木皮也此蓋消石外裹如玉璞耳舊作硝俗字

滑石味甘寒主身熱洩澀女子乳難癰閉利小便蕩胃中積聚寒熱益精氣久服輕身耐飢長年生山谷名醫曰一名液石一名共石一名脫石一名番石

生赭陽及太山之陰或掖北白山或卷山采無時
案范子計然云滑石白滑者善南越志云澆城縣
出澆石即滑石也

石膽味酸寒主明目目痛金創諸癩瘞女子陰蝕痛
石淋寒熱崩中下血諸邪毒氣令人有子鍊餌服之
不老久服增壽神僊能化鐵為銅成金銀御覽引一作合戍
名畢石生山谷

吳普曰石膽神農酸小寒李氏大寒桐君辛有毒

扁鵲苦無毒御覽引云一名黑石二月庚子辛丑采

名醫曰一名黑石一名碁石一名銅勒生羌道羌

里句青山二月庚子辛丑日采

案范子計然云石膽出隴西羌道陶弘景云僊經
一名立制石周禮瘍醫凡療瘍以五毒攻之鄭云

今醫方有五毒之藥作之合黃稔置石膽丹沙雄
黃礬石慈石其中燒之三日三夜其煙上著以雞
羽掃取之以注創惡肉破骨則盡出圖經曰故翰
林學士楊億嘗筆記直史館楊岨有瘍生於頰人
語之依鄭法合燒藥成注之瘡中遂愈信古方攻
病之速也

空青味甘寒主青盲耳聾明目利九竅通血脈養精
神久服輕身延年不老能化銅鐵鉛錫作金生山谷
吳普曰空青神農甘一經酸久服有神僊玉女來
侍使人志高御覽

名醫曰生益州及越巂山有銅處銅精熏則生空
青其腹中空三月中旬采亦無時

案西山經云皇人之山其下多青郭璞云空青曾

青之屬范子計然云空青出巴郡司馬相如賦云丹青張揖云青青艸也顏師古云青艸今之丹青也

曾青味酸小寒主目痛止淚出風痺利關節通九竅破癥堅積聚久服輕身不老能化金銅生山谷

名醫曰生蜀中及越嶲采無時

案管子揆度篇云秦明山之曾青荀子云南海則有曾青楊倞注曾青銅之精范子計然云曾青出弘農豫章白青出新涂青色者善淮南子地形訓云青天八百歲生青曾高誘云青曾青石也

禹餘糧味甘寒主欬逆寒熱煩滿下

御覽有赤白血

赤白血

閉癥瘕大熱鍊餌服之不飢輕身延年生池澤及山

島中

名醫曰一名白餘糧生東海及池澤中

案范子計然云禹餘糧出河東列僊傳云赤斧上
華山取禹餘糧博物志云世傳昔禹治水棄其所
餘食于江中而爲藥也按此出神農經則禹非夏
禹之禹或本名白餘糧名醫等移其名耳

太一餘糧味甘平主欬逆上氣癥瘕血閉漏下除邪
氣久服耐寒暑不飢輕身飛行千里神僊御覽引作若神僊

一名石罍生山谷

吳普曰太一禹餘糧一名禹哀神農岐伯雷公甘
平李氏小寒扁鵲甘無毒生太山上有甲甲中有
白白中有黃如鷄子黃色九月采或無時

名醫曰生太山九月采

案抱朴子金丹篇云靈丹經用丹沙雄黃雌黃石

硫黃曾青礬石磁石戎鹽太一禹餘糧亦用六一

泥及神室祭醮合之三十六日成

白石英味甘微温主消渴陰痿不足逆效御覽引作嘔逆胸

鬲閒久寒益氣除風溼痺御覽引作陰溼痺久服輕身御覽引作

健身輕長年生山谷

吳普曰白石英神農甘岐伯黃帝雷公扁鵲無毒

生太山形如紫石英白澤長者二三寸采無時御覽引

引云久服通日月光

名醫曰生華陰及太山

案司馬相如賦有白坳蘇林云白坳白石英也司

馬貞云出魯陽山

紫石英味甘温主心腹欬逆御覽引作嘔逆邪氣補不足女

子風寒在子宮絕孕十年無子久服温中輕身延年

生山谷

吳普曰紫石英神農扁鵲味甘平李氏大寒雷公
大溫岐伯甘無毒生太山或會稽采無時欲令如
削紫色達頭如樗蒲者

又曰青石英形如白石英青端赤後者是赤石英
形如白石英赤端白後者是赤澤有光味苦補心
氣黃石英形如白石英黃色如金白後者是黑石
英形如白石英黑澤有光

御覽掌禹錫
引此節文

名醫曰生太山采無時

青石赤石黃石白石黑石脂等味甘平主黃疸洩利
腸癰膿血陰蝕下血赤白邪氣癰腫疽痔惡創頭瘍
疥搔久服補髓益氣肥健不飢輕身延年五石脂各
隨五色補五藏生山谷中

吳普曰五色石脂一名青赤黃白黑符青符神農
甘雷公酸無毒桐君辛無毒李氏小寒生南山或
海涯采無時赤符神農雷公甘黃帝扁鵲無毒李
氏小寒或生少室或生太山色絳滑如脂黃符李
氏小寒雷公苦或生嵩山色如狫蝟鴈雛采無時
白符一名隨字岐伯雷公酸無毒李氏小寒桐君
甘無毒扁鵲辛或生少室天婁山或太山黑符一
名石泥桐君甘無毒生洛西山空地

名醫曰生南山之陽一本作南陽又云黑石脂一
名石涅一名石墨

案吳普引神農甘云云五石脂各有條後世合爲
一條也范子計然云赤石脂出河東赤色者善列
僊傳云赤須子好食石脂

白青味甘平主明目利九竅耳聾心下邪氣令人吐
殺諸毒三蟲久服通神明輕身延年不老生山谷

吳普曰神農甘平雷公酸無毒生豫章可消而為

銅覽御覽

名醫曰生豫章采無時

案范子計然云白青出巴郡

扁青味甘平主目痛明目折跌癰腫金創不瘳破積

聚解毒氣御覽引作辟毒利精神久服輕身不老生山谷

吳普曰扁青神農雷公小寒無毒生蜀郡治丈夫

內絕令人有子御覽引云治癰腫風痺久服輕身

名醫曰生朱崖武都朱提采無時

案范子計然云扁青出弘農豫章

右玉石上品一十八種舊同

昌蒲味辛温主風寒溼痺效逆上氣開心孔補五藏
通九竅明耳目出聲音久服輕身不忘不迷或延年

一名昌陽

御覽引云生石上一寸九節者久服輕身
云云大觀本無生石上三字有云一寸九

節者良
作黑字生池澤

吳普曰昌蒲一名堯韭

藝文類聚引
云一名昌陽

名醫曰生上洛及蜀郡嚴道五月十二日采根陰

乾

案說文云茆昌蒲也益州生茆茆也廣雅云邛

昌陽昌蒲也周禮醢人云昌本鄭云昌本昌蒲根

切之四寸為菹春秋左傳云饗以昌歎杜預云昌

歎昌蒲菹呂氏春秋云冬至後五旬七日昌始生

昌者百艸之先於是始耕淮南子說山訓云昌羊

去蚤蝨而來蛉窮高誘云昌羊昌蒲列僊傳云商

邱子胥食昌蒲根務光服蒲韭根離騷艸木疏云
沈存中云所謂蘭蓀卽今昌蒲是也

鞠華味苦平主風頭眩腫痛目欲脫淚出皮膚死肌
惡風溼痺久服利血氣輕身耐老延年一名節華生
川澤及田野

吳普曰菊華一名白華

初學記

一名女華一名女莖

名醫曰一名日精一名女節一名女華一名女莖

一名更生一名周盈一名傅延年一名陰成生雍

州正月采根三月采葉五月采莖九月采花十一

月采實皆陰乾

案說文云鞠治牆也鞠日精也似秋華或省作鞠
爾雅云鞠治牆郭璞云今之秋華菊則鞠鞠欬皆
秋華字今惟作菊說文以爲大菊蘧麥假音用之

也

人參味甘微寒主補五藏安精神定魂魄止驚悸除邪氣明目開心益智久服輕身延年一名人銜一名鬼蓋生山谷

吳普曰人參一名土精一名神艸一名黃參一名血參一名人微一名玉精神農甘小寒桐君雷公苦岐伯黃帝甘無毒扁鵲有毒生邯鄲三月生葉小兒核黑莖有毛三月九月采根根有頭足手面

目如人

御覽

名醫曰一名神艸一名人微一名土精一名血參如人形者有神生上黨及遼東二月四月八月上旬採根竹刀刮暴乾無令見風

案說文云藳人藳藥艸出上黨廣雅云地精人葠

也范子計然云人參出上黨狀類人者善劉敬叔異苑云人參一名土精生上黨者佳人形皆具能作兒啼

天門冬味甘平主諸暴風溼偏痺強骨髓殺三蟲去

伏尸久服輕身益氣延年一名顛勒

爾雅注引云門冬一名滿冬今

無文生山谷

名醫曰生奉高山二月七月八月采根暴乾

案說文云蔞蔞蔞蔞冬也中山經云條谷之山其艸多蔞冬爾雅云蔞蔞冬列僊傳云赤須子食天門冬抱朴子僊藥篇云天門冬或名地門冬或名筵門冬或名顛棘或名淫羊食或名管松

甘艸味甘平主五藏六府寒熱邪氣堅筋骨長肌肉倍力金創腫解毒久服輕身延年

御覽引云一名美草一名密甘大觀

本
字
黑
生山谷

名醫曰一名密甘一名美草一名蜜草一名路當

蕭艸生河西積沙山及上郡二月八月除日采根

暴乾十日成

案說文云昔甘艸也藟大苦也苦大苦苓也廣雅云美草甘草也毛詩云隰有苓傳云苓大苦爾雅云藟大苦郭璞云今甘艸蔓延生葉似荷青黃莖赤黃有節節有枝相當或云藟似地黄此作甘省字藟苓通

乾地黄味甘寒主折跌絕筋傷中逐血痹填骨髓長肌肉作湯除寒熱積聚除痺生者尤良久服輕身不老一各地髓生川澤

名醫曰一名芑一名芑生咸陽黃土地者佳二月

八月采根陰乾

案說文云芫地黃也禮曰鈺毛牛藿羊芫豕薇廣雅云地髓地黃也爾雅云芫地黃郭璞云一各地髓江東呼芫列僊傳云呂尚服地髓

朮味苦温主風寒溼痺死肌瘞疽止汗除熱消食作煎餌久服輕身延年不飢一名山薊藝文類聚引作山筋生山谷

吳普曰朮一名山連一名山芥一名天蘇一名山

薑

藝文類聚

名醫曰一名山薑一名山連生鄭山漢中南鄭二月三月八月九月采根暴乾

案說文云朮山薊也廣雅云山薑朮也白朮牡丹也中山經云首山艸多茱郭璞云茱山薊也爾雅

云朮山薊郭璞云今朮似薊而生山中范子計然云朮出三輔黃白色者善列僊傳云涓子好餌朮抱朴子僊藥篇云朮一名山薊一名山精故神藥經曰必欲長生長服山精

兔絲子味辛平主續絕傷補不足益氣力肥健汁去面奸久服明目輕身延年一名兔蘆生川澤

吳普曰兔絲一名玉女一名松蘿一名烏蘿一名

鴨蘿一名複實一名赤網生山谷

御覽

名醫曰一名菟縷一名唐蒙一名玉女一名赤網一名兔纍生朝鮮田野蔓延艸木之上色黃而細爲赤網色淺而大爲兔纍九月采實暴乾

案說文云蒙玉女也廣雅云兔邱兔絲也女蘿松蘿也爾雅云唐蒙女蘿女蘿兔絲又云蒙玉女毛

詩云爰采唐矣傳云唐蒙菜名又薦與女蘿傳云
女蘿菟絲松蘿也陸璣云今菟絲蔓連艸上生黃
赤如金今合藥菟絲子是也非松蘿松蘿自蔓松
上枝正青與菟絲異楚詞云被薜荔兮帶女蘿王
逸云女蘿兔絲也淮南子云千秋之松下有茯苓
上有兔絲高誘注云茯苓千歲松脂也菟絲生其
上而無根舊作菟非

牛藪味苦酸御覽作辛主寒御覽作傷寒溼痿痺四肢拘攣藪

痛不可屈伸逐血氣傷熱火爛墮胎久服輕身耐老

能御覽作老一名百倍生川谷

吳普曰牛藪神農甘一經酸黃帝扁鵲甘李氏温

雷公酸無毒生河內或臨邛葉如夏藍莖本赤二

月八月采御覽

名醫曰生河內及臨朐二月八月十月采根陰乾
案廣雅云牛莖牛膝也陶弘景云其莖有節似膝
故以爲名也膝當作藪

充蔚子味辛微温主明目益精除水氣久服輕身莖
主癰癢痒可作浴湯一名益母一名益明一名大札
生池澤

名醫曰一名貞蔚生海濱五月采

案說文云菴萑也廣雅云益母充蔚也爾雅云萑
菴郭璞云今茺蔚也毛詩云中谷有萑傳云萑離
也陸璣云舊說及魏博士濟陰周元明皆云菴閭
是也韓詩及三蒼說悉云益母故曾子見益母而
感劉歆曰萑臭穢臭穢卽茺蔚也舊作茺非
女萎味甘平主中風暴熱不能動搖跌筋結肉諸不

足久服去面黑奸好顏色潤澤輕身不老生山谷

吳普曰女萎一名葳蕤一名玉馬一名地節一名

蟲蟬一名烏萎一名熒一名玉竹神農苦一經甘

桐君雷公扁鵲甘無毒黃帝辛生太山山谷葉青

黃相值如薑二月七月采治中風暴熱久服輕身

御覽一名左眇久服輕身耐老同上

名醫曰一名熒一名地節一名玉竹一名馬熏生

太山及邱陵立春後采陰乾

案爾雅云熒委萎郭璞云藥艸也葉似竹大者如

箭竿有節葉狹而長表白裏青根大如指長一二

尺可啖陶弘景云按本經有女萎無萎蕤別錄有

萎蕤而爲用正同疑女萎卽萎蕤也惟名異耳陳

藏器云魏志樊阿傳青黏一名黃芝一名地節此

卽萎蕤

防葵味辛寒主疝瘕腸洩膀胱熱結溺不下欬逆温瘡癩癩驚邪狂走久服堅骨髓益氣輕身一名梨蓋生川谷

吳普曰房葵一名梨蓋一名爵離一名房苑一名

晨艸一名利如一名方蓋神農辛小寒桐君扁鵲

無毒岐伯雷公黃帝苦無毒莖葉如葵上黑黃二

月生根根大如桔梗根中紅白六月花白七月八

月實白三月三日采根

御覽

名醫曰一名房慈一名爵離一名農果一名利茹

一名方蓋生臨淄及嵩高太山少室三月三日采

根暴乾

案博物志云防葵與狼毒相似

苾胡味苦平主心腹去腸胃中結氣飲食積聚寒熱邪氣推陳致新久服輕身明目益精一名地熏

吳普曰苾蒭一名山菜一名茹草神農岐伯雷公

苦無毒生冤句二月八月采根

御覽

名醫曰一名山菜一名茹草葉一名芸蒿辛香可食生弘農及冤句二月八月采根暴乾

案博物志云芸蒿葉似邪蒿春秋有白蕘長四五寸香美可食長安及河內並有之夏小正云正月采芸月令云仲春芸始生呂氏春秋云菜之美者華陽之芸皆卽此也急就篇有芸顏師古注云卽今芸蒿也然則是此苾胡葉矣苾柴前聲相轉名醫別出前胡條非陶弘景云本經上品有苾胡而無此晚來醫乃用之

麥門冬味甘平主心腹結氣傷中傷飽胃絡脈絕羸瘦短氣久服輕身不老不飢生川谷及隄阪

吳普曰一名馬韭一名藁冬一名忍冬一名忍陵

一名不死藥一名僕壘一名隨脂太平御覽引云一名羊韭秦一

名馬韭一名禹韭一名越韭一名羊齊一名禹餘糧神農岐伯

甘平黃帝桐君雷公甘無毒李氏甘小温扁鵲無

毒生山谷肥地葉如韭肥澤叢生采無時實青黃

名醫曰秦名羊韭齊名愛韭楚名馬韭越名羊著

一名禹葭一名禹餘糧葉如韭冬夏長生生函谷

肥土石閒久廢處二月三月八月十月采陰乾

案說文云葱葱冬艸中山經云青要之山是多僕

纍据吳普說即麥門冬也忍葱壘音同陶弘景

云實如青珠根似穰麥故謂麥門冬

獨活味苦平主風寒所擊金瘡止痛賁豚癩瘡女子
疝瘕久服輕身耐老一名羌活一名羌青一名護羌
使者生川谷

吳普曰獨活一名胡王使者神農黃帝苦無毒八

月采此藥有風花不動無風獨搖

御覽

名醫曰一名胡王使者一名獨搖草此草得風不
搖無風自動生雍州或隴西南安二月八月采根
暴乾

案列僊傳云山圖服羌活獨活則似二名護羌胡
王皆羌字緩聲猶專諸爲專設諸庾公差爲庾公
之斯非有義也

車前子味甘寒無毒主氣癰止痛利水道小便除溼
痺久服輕身耐老一名當道

御覽有云一名牛舌
大觀本作牛遺黑字生

平澤

名醫曰一名茅苜一名蝦蟆衣一名牛遺一名勝
寫生真定邱陵阪道中五月五日采陰乾

案說文云茅一曰茅苜苜茅苜一名馬寫其實如
李令人宜子周書所說廣雅云當道馬寫也爾雅
云茅苜馬寫馬寫車前郭璞云今車前草大葉長
穗好生道邊江東呼爲蝦蟆衣又藟牛藟孫炎云
牛前一名牛藟毛詩云采采茅苜傳云茅苜馬寫
馬寫車前也陸璣云馬寫一名車前一名當道喜
在牛蹟中生故曰車前當道也今藥中車前子是
也幽州人謂之牛舌草

木香味辛主邪氣辟毒疫温鬼強志主淋露御覽引氣

不足大觀久服不夢寤御覽引云一名密青又

本作黑字

俱作黑字生山谷

名醫曰一名蜜香生永昌

署豫

舊作署豫是

味甘温主傷中補虛羸除寒熱邪

氣補中益氣力長肌肉久服耳目聰明輕身不飢延

年一名山芋生山谷

吳普曰薯蓣一名諸署

御覽作薯蓣類聚亦作諸署齊越

名山芋一名修脆一名兒草

御覽引云秦楚名玉延齊越名山芋鄭趙

名山芋一名玉延

神農甘小温桐君雷公甘御覽作苦無毒或

生臨胸鍾山始生赤莖細蔓五月華白七月實青

黄八月熟落根中白皮黄類芋

御覽引云二月三月八月采根惡甘

遂

名醫曰秦楚名玉延鄭越名土藟生蒿高二月八

月采根暴乾

案廣雅云玉延諸蕈署預也北山經云景山草多
諸蕈郭璞云根似羊蹄可食今江南單呼爲諸語
有輕重耳范子計然云諸蕈本出三輔白色者善
本艸衍義云山藥上一字犯宋英廟諱下一字曰
預唐代宗名豫故改下一字爲藥

薏苡仁味甘微寒主筋急拘攣不可屈伸風溼痹下
氣久服輕身益氣其根下三蟲一名解蠱生平澤及
田野

名醫曰一名屋茨一名起實一名贛生真定八月
采實采根無時

案說文云蕃蕃苜一曰蕃英贛一曰薏苡廣雅云
贛起實蕃苜也吳越春秋絲娶於有莘氏之女名
曰女嬉年壯未孳嬉於砥山得薏苡而吞之意若

爲人所感因而妊孕後漢書馬援傳援在交趾常
餌薏苡實用能輕身省欲以勝瘴蕃俗作薏非

澤瀉味甘寒主風寒溼痺乳難消水養五藏益氣力
肥健久服耳目聰明不飢延年輕身面生光能行水
上一名水瀉一名芒芋一名鵠瀉生池澤

名醫曰生汝南五六月采根陰乾

案說文云薷水寫也爾雅云蒲葍郭璞云今澤葍
又薷牛脣郭璞云毛詩傳云水葍也如續斷寸寸
有節拔之可復毛詩云言采其薷傳云薷水葍也
陸璣云今澤葍也其葉如車前艸大其味亦相似
徐州廣陵人食之

遠志味苦溫主欬逆傷中補不足除邪氣利九竅益
智慧耳目聰明不忘強志倍力久服輕身不老葉名

小艸一名棘菟

陸德明爾雅音義引作菟

一名萋繞

御覽作要繞

一名

細草生川谷

名醫曰生太山及冤句四月采根葉陰乾

案說文云菟棘菟也廣雅云棘菟遠志也其上謂之小艸爾雅云萋繞棘菟郭璞云今遠志也似麻黃赤華葉銳而黃

龍膽味苦澀主骨閒寒熱驚癩邪氣續絕傷定五藏殺蠱毒久服益智不忘輕身耐老一名陵游生山谷名醫曰生齊胸及冤句二月八月十一月十二月采根陰乾

細辛味辛溫主欬逆頭痛齒動百節拘攣風溼痹痛死肌久服明目利九竅輕身長年一名小辛生山谷吳普曰細辛一名細艸御覽引云一名小辛神農黃帝雷公

桐君辛小温岐伯無毒李氏小寒如葵葉色赤黑

一根一葉相連

御覽引云三月八月采根

名醫曰生華陰二月八月采根陰乾

案廣雅云細條少辛細辛也中山經云浮戲之山

上多少辛郭璞云細辛也管子地員篇云小辛大

蒙苑子計然云細辛出華陰色白者善

石斛味甘平主傷中除痹下氣補五藏虛勞羸瘦強

陰久服厚腸胃輕身延年一名林蘭

御覽引云一名禁生大觀本作

黑字生山谷

吳普曰石斛神農甘平扁鵲酸李氏寒

御覽

名醫曰一名禁生一名杜蘭一名石遂生六安水

傍石上七月八月采莖陰乾

案苑子計然云石斛出六安

巴戟天味辛微温主大風邪氣陰痿不起強筋骨安
五藏補中增志益氣生山谷

名醫曰生巴郡及下邳二月八月采根陰乾

白英味甘寒主寒熱八疽消渴補中益氣久服輕身

延年

一名穀菜

元本誤作黑字

生山谷

名醫曰一名白艸生益州春采葉夏采莖秋采花

冬采根

案爾雅云苻鬼目郭璞云今江東有鬼目艸莖似
葛葉圓而毛子如耳璫也赤色叢生唐本注白英
云此鬼目艸也

白蒿味甘平主五藏邪氣風寒溼痺補中益氣長毛
髮令黑療心懸少食常飢久服輕身耳目聰明不老
生川澤

名醫曰生中山二月采

案說文云蘩白蒿也艾冰臺也廣雅云蘩母蒹藨也爾雅云艾冰臺郭璞云今艾白蒿夏小正云二月采蘩傳云蘩由胡由胡者繁母也繁母者旁勃也爾雅云蘩皤蒿郭璞云白蒿又蘩由胡郭璞云未詳毛詩云于以采蘩傳云蘩皤蒿也又采蘩祁祁傳云蘩白蒿也陸璣云凡艾白色者爲皤蒿楚詞王逸注云艾白蒿也按皤白音義皆相近艾是藥名本艸經無者卽白蒿是也名醫別出艾條非赤箭味辛溫主殺鬼精物蠱毒惡氣久服益氣力長陰肥健輕身增年一名離母一名鬼督郵生川谷

吳普曰鬼督郵一名神艸一名閻狗或生太山或少室莖箭赤無葉根如芋子三月四月八月采根

日乾治癰腫覽御

名醫曰生陳倉雍州及太山少室三月四月八月

采根暴乾

案抱朴子云按僊方中有合離艸一名獨搖一名

離母所以謂之合離離母者此艸為物下根如芋

魁有游子十二枚周環之去大魁數尺雖相須而

實不相連但以氣相屬耳別說云今醫家見用天

麻卽是此赤箭根

奄閨子

舊作菴閨是

味苦微寒主五藏瘵血腹中水

氣臚張留熱風寒溼痺身體諸痛久服輕身延年不

老生川谷

吳普曰奄閨神農雷公桐君岐伯苦小温無毒李

氏温或生上黨葉青厚兩相當七月花白九月實

黑七月九月十月采驢馬食僊去

御覽

名醫曰駮驢食之神僊生雍州亦生上黨及道邊

十月采實陰乾

案司馬相如賦有奄閭張揖云奄閭蒿也子可治疾

析莫子味辛微温主明目目痛淚出除痺補五藏益精光久服輕身不老一名蔑析一名大藪一名馬辛生川澤及道旁

吳普曰析莫一名析目一名榮冥一名馬駢雷公神農扁鵲辛李氏小温四月采乾二十日生道旁得細辛良畏乾薑苦參薺實神農無毒生野田五月五日采陰乾治腹脹

御覽

名醫曰一名大薺生咸陽四月五月采暴乾

案說文云莫析莫大薺也廣雅云析莫馬辛也爾雅云析莫大薺郭璞云薺葉細俗呼之曰老薺舊作薺非

著實味苦平主益氣充肌膚明目聰慧先知久服不飢不老輕身生山谷

吳普曰著實味苦酸平無毒主益氣充肌膚明目聰慧先知久服不飢不老輕身生少室山谷八月

九月采實暴乾

御覽

名醫曰生少室八月九月采實日乾

案說文云著蒿屬生千歲三百莖史記龜策傳云著百莖共一根

赤芝味苦平主胸中結益心氣補中增慧智不忘久食輕身不老延年神僊一名丹芝黑芝味鹹平主癰

利水道益腎氣通九竅聰察久食輕身不老延年神
僊一名元芝青芝味酸平主明目補肝氣安精魂仁
恕久食輕身不老延年神僊一名龍芝白芝味辛平
主效逆上氣益肺氣通利口鼻強志意勇悍安魄久
食輕身不老延年神僊一名玉芝黃芝味甘平主心
腹五邪益脾氣安神忠信和樂久食輕身不老延年
神僊一名金芝紫芝味甘温主耳聾利關節保神益
精氣堅筋骨好顏色久食輕身不老延年一名木芝
生山谷舊作六
種今并

吳普曰紫芝一名木芝

名醫曰赤芝生霍山黑芝生恆山青芝生太山白
芝生華山黃芝生嵩山紫芝生高夏地上色紫形
如桑御覽六芝皆無毒六月八月采

案說文云芝神艸也爾雅云茵芝郭璞云芝一歲
三華瑞艸禮內則云芝栢盧植注云芝木芝也楚
詞云采三秀于山閒王逸云三秀謂芝艸後漢書
華佗傳有漆葉青黏散注引佗傳曰青黏者一名
地節一名黃芝主理五藏益精氣本字書無黏字
相傳音女廉反列僊傳云呂尚服澤芝抱朴子僊
藥篇云赤者如珊瑚白者如截肪黑者如澤漆青
者如翠羽黃者如紫金而皆光明洞徹如堅冰也
卷柏味辛溫生山谷主五藏邪氣女子陰中寒熱痛
癥瘕血閉絕子久服輕身和顏色一名萬歲生山谷

石閒

吳普曰卷柏神農辛桐君雷公甘

御覽引云一名求股

一名萬歲一名
神枝時生山谷

名醫曰一名豹足一名求股一名交時生常山五月七月采陰乾

案范子計然云卷柏出三輔

藍實味苦寒主解諸毒殺蠱蚊注鬼螫毒久服頭不白輕身生平澤

名醫曰其莖葉可以染青生河內

案說文云葳馬藍也藍染青草也爾雅云葳馬藍郭璞云今大葉冬藍也周禮掌染艸鄭注云染艸藍蒨象斗之屬夏小正五月啓灌藍毛詩云終朝采藍箋云藍染艸也

芎藭味辛溫主中風入腦頭痛寒痺筋攣緩急金創婦人血閉無子生川谷

吳普曰芎藭御覽引云一名香果神農黃帝岐伯雷公辛無

毒扁鵲酸無毒李氏生温熟寒或生胡無桃山陰

或太山御覽作或斜谷葉香細青黑文赤如藁本

冬夏叢生五月華赤七月實黑莖端兩葉三月采

根有節似馬銜狀

名醫曰一名胡窮一名香果其葉名蘼蕪生武功

斜谷西嶺三月四月采根暴乾

案說文云營營蘼香艸也芎司馬相如說或从弓

春秋左傳云有山鞠窮乎杜預云鞠窮所以禦溼

西山經云號山其艸多芎蘼郭璞云芎蘼一名江

蘼范子計然云芎蘼生始無枯者善有脱司馬相

如賦有芎蘼司馬貞引司馬彪云芎蘼似藁本郭

璞云今歷陽呼為江離

蘼蕪味辛温主欬逆定驚氣辟邪惡除蠱毒鬼注去

三蟲久服通神一名薇蕪生川澤

吳普曰蘼蕪一名芎藭

御覽

名醫曰一名苧蘿芎藭苗也生雍州及冤句四月五月采葉暴乾

案說文云蘼蕪蕪也蘿苧蘿蘼蕪爾雅云蘧苧蘼蕪郭璞云香艸葉小如委狀淮南子云似蛇牀山海經云臭如蘼蕪司馬相如賦有江離蘼蕪司馬貞引樊光云蘼本一名蘼蕪根名蘧苧

黃連味苦寒主熱氣目痛皆傷泣出明目

御覽引云主莖傷大

無觀本 一名王連生川谷

吳普曰黃連神農岐伯黃帝雷公苦無毒李氏小寒或生蜀郡太山之陽

御覽

名醫曰生巫陽及蜀郡太山二月八月采

案廣雅云王連黃連也范子計然云黃連出蜀郡黃肥堅者善

絡石味苦温主風熱死肌癰傷口乾舌焦癰腫不消
喉舌腫水漿不下久服輕身明目潤澤好顏色不老
延年一名石鮫生川谷

吳普曰落石一名鱗石一名明石一名縣石一名
雲華一名雲珠一名雲英一名雲丹神農苦小温
雷公苦無毒扁鵲桐君甘無毒李氏大寒云藥中
君采無時御覽

名醫曰一名石蹉一名略石一名明石一名領石
一名縣石生太山或石山之陰或高山巖石上或
生人間正月采

案西山經云上申之山多硤石疑卽此郭璞云硤
磊硤大石皃非也唐本注云俗名耐冬山南人謂
之石血以其包絡石木而生故名絡石別錄謂之
石龍藤以石上生者良

疾藜子味苦温主惡血破癥結積聚喉痹乳難久服
長肌肉明目輕身一名旁通一名屈人一名止行一

名豺羽一名升推

御覽引云一名君水香大觀本無文

生平澤或道旁

名醫曰一名卽藜一名茨生馮翊七月八月采實

暴乾

案說文云薺蒺藜也詩曰牆有薺以茨爲茅葦覆
屋宇爾雅云茨蒺藜郭璞云布地蔓生細葉子有
三角刺人毛詩云牆有茨傳云茨蒺藜也

黃耆味甘微温主癰疽久敗創排膿止痛大風癩疾

五痔鼠癭補虛小兒百病一名戴糝生山谷

名醫曰一名戴樾一名獨樾一名芟艸一名蜀脂

一名百本生蜀郡白水漢中二月十月采陰乾

肉松容味甘微温主五勞七傷補中除莖中寒熱痛

養五藏強陰益精氣多子婦人癥瘕久服輕身生山

谷

吳普曰肉菘蓉一名肉松蓉神農黃帝鹹雷公酸

小温御覽作李氏小温生河西御覽作東山陰地長三四寸叢

生或代郡御覽下有鴈門二字二月至八月采御覽引云陰乾用之

名醫曰生河西及代郡鴈門五月五日采陰乾

案吳普云一名肉松蓉當是古本蓉即容字俗寫

菘蓉非正字也陶弘景云是野馬精落地所生生

時似肉舊作肉菘蓉非

防風味甘溫無毒主大風頭眩痛惡風風邪目盲無
所見風行周身骨節疼痛御覽作痛煩滿久服輕身一名

銅芸御覽作芒生川澤

吳普曰防風一名迴雲一名回艸一名百枝一名

蘭根一名百韭一名百種神農黃帝岐伯桐君雷

公扁鵲甘無毒李氏小寒或生邯鄲上蔡正月生

葉細圓青黑黃白五月花黃六月實黑三月十月

采根日乾琅邪者良御覽

名醫曰一名茴艸一名百枝一名屏風一名蘭根

一名百蜚生沙苑及邯鄲琅邪上蔡二月十月采

根暴乾

案范子計然云防風出三輔白者善

蒲黃味甘平主心腹旁光寒熱利小便止血消瘀血

久服輕身益氣力延年神僊生池澤

名醫曰生河東四月采

案玉篇云蒿謂今蒲頭有臺臺上有重臺中出黃
卽蒲黃陶弘景云此卽蒲釐花上黃粉也僊經亦
用此攷爾雅苻離其上蒿苻離與蒲釐聲相近疑
卽此

香蒲味甘平主五藏心下邪氣口中爛臭堅齒明目

聰耳久服輕身耐老御覽作一名眊御覽云生池澤

吳普曰眊一名眊石一名香蒲神農雷公甘生南

海池澤中御覽

名醫曰一名醮生南海

案說文云菩艸也玉篇云菩香艸也又音蒲本艸
圖經云香蒲蒲黃苗也春初生嫩葉未出水時紅

白色茸茸然周禮以爲菹

續斷味苦微温主傷寒補不足金創癰傷折跌續筋

骨婦人乳難御覽作乳癰云崩中久服益氣力一名

龍豆一名屬折生山谷

名醫曰一名接骨一名南艸一名槐生常山七月

八月采陰乾

案廣雅云襄續斷也范子計然云續斷出三輔桐

君藥錄云續斷生蔓延葉細莖如荏大根本黃白

有汁七月八月采根

漏蘆味苦鹹寒主皮膚熱惡創疽痔溼痺下乳汁久

服輕身益氣耳目聰明不老延年一名野蘭生山谷

名醫曰生喬山八月采根陰乾

案廣雅云飛廉扇蘆也陶弘景云俗中取根名鹿

驪

營實味酸溫主癰疽惡創結肉跌筋敗創熱氣陰蝕
不瘳利關節一名牆薇一名牆麻一名牛棘生川谷
吳普曰薔薇一名牛勒一名牛膝一名薔靡一名

山棗

御覽

名醫曰一名牛勒一名薔靡一名山棘生零陵及
蜀郡八月九月采陰乾

案陶弘景云卽是牆薇子

天名精味甘寒主瘀血瘕欲死下血止血利小便
久服輕身耐老一名麥句薑一名蝦蟆藍一名豕首
生川澤

名醫曰一名天門精一名玉門精一名堯顛一名
蟾蜍蘭一名覲生平原五月采

案說文云藪豕首也爾雅云茹藪豕首郭璞云今江東呼豨首可以燭蠶蛹陶弘景云此卽今人呼爲豨螿唐本云鹿活艸是也別錄一名天蔓菁南人呼爲地松掌禹錫云陳藏器別立地菘條後人不當仍其謬

決明子味鹹平主青盲目淫膚赤白膜眼赤痛淚出久服益精光

太平御覽引作理目珠精理卽治字

輕身生川澤

吳普曰決明子一名艸決明一名羊明

御覽

名醫曰生龍門石決明生豫章十月采陰乾百日案廣雅云羊躑躅莢光也又決明羊明也爾雅云薺荇莢光郭璞云莢明也葉黃銳赤華實如山茱萸陶弘景云形似馬蹄決明

丹參味苦微寒主心腹邪氣腸鳴幽幽如走水寒熱

積聚破癥除瘕止煩滿益氣一名卻蟬艸生川谷

吳普曰丹參一名赤參一名木羊乳一名卻蟬艸

神農桐君黃帝雷公扁鵲苦無毒李氏大寒岐伯

鹹生桐柏或生太山山陵陰莖華小方如荏毛根

赤四月華紫五月采根陰乾治心腹痛

御覽

名醫曰一名赤參一名木羊乳生桐柏山及太山

五月采根暴乾

案廣雅云卻蟬丹參也

茜根味苦寒主寒溼風痺黃疸補中生川谷

名醫曰可以染絳一名地血一名茹慮一名茅蒐

一名穉生喬山二月三月采根暴乾

案說文云茜茅蒐也蒐茅蒐茹蘆人血所生可以

染絳从艸从鬼廣雅云地血茹蘆穉也爾雅云茹

蘆茅蒐郭璞云今菘也可以染絳毛詩云茹蘆在
阪傳云茹蘆茅蒐也陸璣云一名地血齊人謂之
茜徐州人謂之牛蔓徐廣注史記云茜一名紅藍
其花染繒赤黃也按名醫別出紅藍條非

飛廉味苦平主骨節熱脛重酸疼久服令人身輕一
名飛輕已上四字原本黑字生川澤

名醫曰一名伏兔一名飛雉一名木禾生河內正
月采根七月八月采花陰乾

案廣雅云伏豬木禾也飛廉扇蘆也陶弘景云今
既別有漏蘆則非此別名耳

五味子味酸温主益氣欬逆上氣勞傷羸瘦補不足
強陰益男子精御覽引云一名會及大觀本作黑字生山谷

吳普曰五味子一名元及御覽

名醫曰一名會及一名元及生齊山及代郡八月

采實陰乾

案說文云蒨莖豬也莖莖豬艸也藉莖藉也廣雅云會及五味也爾雅云蒨莖藉郭璞云五味也蔓生子叢在莖頭抱樸子僊藥篇云五味者五行之精其子有五味移門子服五味子十六年色如玉女入水不露入火不灼也

旋華味甘温主益氣去面奸御覽作野黑色媚好御覽作令人色

悅其根味辛主腹中寒熱邪氣利小便久服不飢輕

身澤一名筋根華一名金沸御覽引云一名美生平澤大觀本作黑字

名醫曰生豫州五月采陰乾

案陶弘景云東人呼為山薑南人呼為美艸本艸

衍義云世又謂之鼓子花

蘭艸味辛平主利水道殺蠱毒辟不祥久服益氣輕身不老通神明一名水香生池澤

名醫曰生大吳四月五月采

案說文云蘭香艸也廣雅云蘭蘭也易其臭如蘭鄭云蘭香艸也夏小正五月蓄蘭毛詩云方秉蘭兮傳云蘭蘭也陸璣云蘭卽蘭香艸也其莖葉似藥艸澤蘭范子計然云大蘭出漢中三輔蘭出河東弘農白者善元楊齊賢注李白詩引本艸云蘭艸澤蘭二物同名蘭艸一名水香云都梁是也水經零陵郡都梁縣西小山上有一潭水其中悉生蘭艸綠葉紫莖澤蘭如薄荷微香荆湘嶺南人家多種之與蘭大抵相類顏師古以蘭艸爲澤蘭非也蛇牀子味苦平主婦人陰中腫痛男子陰痿溼痒除

痺氣利關節瘕癩惡創久服輕身一名蛇米生川谷及田野

吳普曰蛇牀一名蛇珠御覽

名醫曰一名蛇粟一名虺牀一名思鹽一名繩毒

一名棗棘一名牆靡生臨淄五月采實陰乾

案廣雅云蚘粟馬牀蚘牀也爾雅云盱虺牀淮南

子汜論訓云亂人者若蛇牀之與靡蕪

地膚子味苦寒主旁光熱利小便補中益精氣久服

耳目聰明輕身耐老一名地葵御覽引云一名地華

脈一作麥皆黑字生平澤及田野

名醫曰一名地麥生荊州八月十月采實陰乾

案廣雅云地葵地膚也列僊傳云文賓服地膚鄭

樵云地膚曰落帚亦曰地掃爾雅云并馬帚即此

也今人亦用爲箒

景天味苦平主大熱火創身熱煩邪惡氣華主女人

漏下赤白輕身明目一名戒火一名慎火御覽引云一名水母

大觀本作黑生川谷

名醫曰一名火母一名救火一名據火生太山四

月四日七月七日采陰乾

案陶弘景云今人皆益養之於屋上云以辟火

因陳御覽作茵陳味苦平主風溼寒熱邪氣熱結黃疸久

服輕身益氣耐老御覽作能老生邱陵阪岸上

吳普曰因塵神農岐伯雷公苦無毒黃帝辛無毒

生田中葉如藍十一月采御覽

名醫曰白兔食之僊生太山五月及立秋采陰乾

案廣雅云因塵馬先也陶弘景云僊經云白蒿白

兔食之僊而今因陳乃云此恐非耳陳藏器云茵
陳經冬不死因舊苗而生故名茵陳後加蒿字也
据此知舊作茵陳蒿非又按廣雅云馬先疑即馬
新蒿亦白蒿之類

杜若味辛微温主胸脅下逆氣温中風入腦戶頭腫
痛多涕淚出久服益精引藝文類聚明目輕身一名杜

衡

引藝文類聚
作蘅非

生川澤

名醫曰一名杜連一名白連一名白苓一名若芝
生武陵及冤句二月八月采根暴乾

案說文云若杜若香艸廣雅云楚蘅杜蘅也西山
經云天帝之上有艸焉其狀如葵其臭如麝蕪名
曰杜衡爾雅云杜土鹵郭璞云杜蘅也似葵而香
楚詞云采芳州兮杜若范子計然云杜若生南郡

漢中又云秦蘅出於隴西天水沈括補筆談云杜若卽今之高良薑後人不識又別出高良薑條按經云一名杜衡是名醫別出杜蘅條非也衡正字俗加艸

沙參味苦微寒主血積驚氣除寒熱補中益肺氣久服利人一名知母生川谷

吳普曰白沙參一名苦心一名識美一名虎須一名白參一名志取一名文虎神農黃帝扁鵲無毒岐伯鹹李氏大寒生河內川谷或般陽瀆山三月生如葵葉青實白如芥根大白如蕪菁三月采御覽一名醫曰一名苦心一名志取一名虎鬚一名白參一名識美一名文希生河內及冤句般陽瀆山二

月八月采根暴乾

案廣雅云苦心沙參也其蒿青蓑也范子計然云

白沙參出洛陽白者善

白兔藿味苦平主蛇虺蜂蠆狗菜肉蠱毒注一名

白葛生山谷

吳普曰白菟藿一名白葛穀覽御

名醫曰生交州

案陶弘景云都不聞有識之者想當似葛耳唐本

注云此艸荆襄山谷大有俗謂之白葛

徐長卿味辛温主鬼物百精蠱毒疫疾邪惡氣温瘡

久服強悍輕身一名鬼督郵生山谷

吳普曰徐長卿一名石下長卿神農雷公辛或生

隴西三月采覽御

名醫曰生太山及隴西三月采

案廣雅云徐長卿鬼督郵也陶弘景云鬼督郵之名甚多今俗用徐長卿者其根正如細辛小短扁扁爾氣亦相似

石龍芻味苦微寒主心腹邪氣小便不利淋閉風溼鬼注惡毒久服補虛羸輕身耳目聰明延年一名龍鬚一名艸續斷一名龍珠生山谷

吳普曰龍藟一名龍多一名龍鬚一名續斷一名龍本一名艸毒一名龍華一名懸莞神農李氏小寒雷公黃帝苦無毒扁鵲辛無毒生梁州七月七

日采

御覽此條
誤附續斷

名醫曰一名龍華一名懸莞一名艸毒生梁州溼地五月七月采莖暴乾

案廣雅云龍木龍須也中山經云賈超之山其中

多龍修郭璞云龍須也似莞而細生山石穴中莖列垂可以為席別錄云一名方賓鄭樵云爾雅所謂蓂鼠莞也舊作葛非

薇銜味苦平主風溼痺歷節痛驚癩吐舌悸氣賊風鼠瘦癰腫一名糜銜生川澤

吳普曰薇銜一名糜銜一名無顛一名承膏一名

醜一名無心
覽御

名醫曰一名承膏一名承肌一名無心一名無顛

生漢中及冤句邯鄲七月采莖葉陰乾

雲實味辛温主洩利舊作痢御腸澼殺蟲蠱毒去邪

惡結氣止痛除熱華主見鬼精物多食令人狂走久

服輕身通神明生川谷

吳普曰雲實一名員實一名天豆神農辛小温黃

帝鹹雷公苦葉如麻兩兩相值高四五尺大莖空

中六月花八月九月實十月采御覽

名醫曰一名員實一名雲英一名天豆生河間十

月采暴乾

案廣雅云天豆雲實也

王不留行味苦平主金創止血逐痛出刺除風痺內

寒久服輕身耐老御覽作老增壽生山谷

吳普曰王不留行一名王不流行神農苦平岐伯

雷公甘三月八月采御覽

案鄭樵云王不留行曰禁宮花曰翦金花葉似槐

實作房

升麻味甘辛大觀本主解百毒殺百老物殃鬼辟温

疾障邪毒蠱久服不夭大觀本作主解百毒殺百精

蠱毒此用御覽文一名周升麻作大觀本生山谷舊作黑字據吳普有云神

農甘則本經嘗有此今增入

吳普曰升麻神農甘覽御

名醫曰生益州二月八月采根日乾

案廣雅云周麻升麻也此據御覽

青蘘味甘寒主五藏邪氣風寒溼痺益氣補腦髓堅

筋骨久服耳目聰明不飢不老增壽巨勝苗也生川

谷舊在米穀部非

吳普曰青襄一名夢神神農苦雷公甘覽御

名醫曰生中原

案抱樸子僊藥篇云孝經援神契曰巨勝延年又

云巨勝一名胡麻餌服之不老耐風溼補衰老也

姑活味甘温主大風邪氣溼痺寒痛久服輕身益壽

耐老一名冬葵子舊在唐本退中無毒今增

名醫曰生河東

案水經注解縣引神農本艸云地有固活女疏銅芸紫苑之族也陶弘景云方藥亦無用此者乃有固活丸卽是野葛一名此又名冬葵子非葵菜之冬葵子療體乖異

別羈味苦微温主風寒溼痺身重四肢疼酸寒邪歷節痛生川谷舊在唐本退中無毒今增

名醫曰一名別枝一名別騎一名鼈羈生藍田二月八月采

案陶弘景云方家時有用處今俗亦絕耳

屈艸味苦主胸脅下痛邪氣腹間寒熱陰痺久服輕

身益氣耐老御覽作補益能老生川澤舊在唐本退中無毒今增

名醫曰生漢中五月采

案陶弘景云方藥不復用俗無識者

淮木味苦平主久欬上氣傷中虛羸女子陰蝕漏下

赤白沃一名百歲城中木生山谷

舊在唐本退中無毒今增

吳普曰淮木神農雷公無毒生晉平陽河東平澤

治久欬上氣傷中羸虛補中益氣

御覽

名醫曰一名炭木生太山采無時

案李當之云是樟樹上寄生樹大銜枝在肌肉今人皆以胡桃皮當之非也桐君云生上洛是木皮狀如厚朴色似桂白其理一縱一橫今市人皆削以充厚朴而無正縱橫理不知此復是何物莫測真假何者爲是也

右艸上品七十三種舊七十二種攷六芝當爲一

升麻當白字米穀部誤入青囊唐本退六種姑活
屈艸淮木皆當入此

牡桂味辛溫主上氣欬逆結氣喉痹吐吸利關節補
中益氣久服通神輕身不老生山谷

名醫曰生南海

案說文云桂江南木百藥之長稜桂也南山經云
招搖之山多桂郭璞云桂葉似枇杷長二尺餘廣
數寸味辛白花叢生山峯冬夏常青間無雜木爾
雅云侵木桂郭璞云今人呼桂皮厚者爲木桂及
單名桂者是也一名肉桂一名桂枝一名桂心

茵桂味辛溫主百病養精神和顏色爲諸藥先聘通
使久服輕身不老面生光華媚好常如童子生山谷
名醫曰生交趾桂林巖崖間無骨正圓如竹立秋

采案楚詞云雜申椒與菌桂兮王逸云茱桂皆香木列僊傳云范蠡好服桂

松脂味苦温主疽惡創頭瘍白禿疥搔風氣安五藏除熱久服輕身不老延年一名松膏一名松肪生山谷

名醫曰生太山六月采

案說文云松木也或作窠范子計然云松脂出隴西如膠者善

槐實味苦寒主五內邪氣熱止涎唾補絕傷五痔火創婦人乳癭子藏急痛生平澤

名醫曰生河南

案說文云槐木也爾雅云櫬槐大葉而黑郭璞云槐樹葉大色黑者名爲櫬又守宮槐葉晝聶宵炕

郭璞云槐葉晝日聶合而夜炕布者名爲守宮槐
枸杞味苦寒主五內邪氣熱中消渴周痹久服堅筋
骨輕身不老御覽作耐老一名杞根一名地骨一名枸杞
一名地輔生平澤

吳普曰枸杞一名枸己一名羊乳御覽

名醫曰一名羊乳一名卻暑一名僊人杖一名西
王母杖生常山及諸邱陵阪岸冬采根春夏采葉
秋采莖實陰乾

案說文云檣枸杞也杞枸杞也廣雅云地筋枸杞
也爾雅云杞枸檣郭璞云今枸杞也毛詩云集于
苞杞傳云杞枸檣也陸璣云苦杞秋熟正赤服之
輕身益氣列僊傳云陸通食橐盧木實抱樸子僊
藥篇云象柴一名托盧是也或名僊人杖或云西

王母杖或名天門精或名卻老或各地骨或名枸杞也

柏實味甘平主驚悸安五藏益氣除溼痹久服令人悅澤美色耳目聰明不飢不老輕身延年生山谷

名醫曰生太山柏葉尤良由四時合依方面采陰乾

案說文云柏鞠也廣雅云栝柏也爾雅云柏栭郭璞云禮記曰鬯白以栭范子計然云柏脂出三輔上升價七千中三千一斗

伏苓味甘平主胸脅逆氣御覽作疝氣憂恚驚邪恐悸心

下結痛寒熱煩滿欬逆口焦舌乾利小便久服安魂

養神不飢延年一名茯菟御覽作茯神案元本云其有抱根者名茯神作黑字

生山谷

吳普曰茯苓通神桐君甘雷公扁鵲甘無毒或生
茂州大松根下入地三丈一尺二月七月采御覽
名醫曰其有抱根者名茯苓生太山大松下二月
八月采陰乾

案廣雅云茯苓茯苓也范子計然云茯苓出嵩高
三輔列僊傳云昌容采茯苓餌而食之史記褚先
生云傳曰下有伏靈上有兔絲所謂伏靈者在兔
絲之下狀似飛鳥之形伏靈者千歲松根也食之
不死淮南子說林訓云茯苓掘兔絲死舊作茯苓非
榆皮味甘平主大小便不通利水道除邪氣久服輕
身不飢其實尤良一名零榆生山谷

名醫曰生潁川三月采皮取白暴乾八月采實

案說文云榆白枌枌榆也廣雅云柘榆梗榆也爾

雅云榆白粉郭璞云粉榆先生葉卻著莢皮色白
又蘆莖郭璞云今云刺榆毛詩云東門之粉傳云
粉白榆也又山有蘊傳云樞莖也陸璣云其鍼刺
如柘其葉如榆淪為茹美滑如白榆之類有十種
葉皆相似皮及木理異矣

酸棗味酸平主心腹寒熱邪結氣聚四肢酸疼溼痺
久服安五藏輕身延年生川澤

名醫曰生河東八月采實陰乾四十日成

案說文云棫酸棗也爾雅云棫酸棗郭璞云實小
味酢孟子云養其棫棘趙岐云棫棘小棘所謂酸
棗是也

槩木味苦寒主五藏腸胃中結熱黃疸腸痔止洩利
女下漏下赤白陰陽蝕創一名檀桓生山谷

名醫曰生漢中及永昌

案說文云檠黃木也檠木也司馬相如賦有檠張揖云檠木可染者顏師古云檠黃檠也

乾漆味辛溫無毒主絕傷補中續筋骨填髓腦安五藏五緩六急風寒溼痺生漆去長蟲久服輕身耐老生川谷

名醫曰生漢中夏至後采之

案說文云棗木汁可以髹物象形棗如水滴而下以漆爲漆水字周禮載師云漆林之征鄭玄云故書漆林爲棗林杜子春云當爲漆林

五加皮味辛溫主心腹疝氣腹痛益氣療疔小兒不能行疽創陰蝕一名豺漆

名醫曰一名豺節生漢中及冤句五月十月采莖

十月采根陰乾

案大觀本艸引東華真人煑石經云舜常登蒼梧山曰厥金玉之香艸朕用偃息正道此乃五加也魯定公母單服五加酒以致不死

蔓荆實味苦微寒主筋骨間寒熱痺拘攣明目堅齒利九竅去白蟲久服輕身耐老小荆實亦等生山谷名醫曰生河間南陽寘句或平壽都鄉高岸上及田野中八月九月采實陰乾

案廣雅云牡荆蔓荆也廣志云楚荆也牡荆蔓荆也据牡曼聲相近故本經于蔓荆不載所出州土以其見牡荆也今或別爲二條非

辛夷味辛温主五藏身體寒風頭腦痛面姦久服下氣輕身明目增年耐老一名辛矧御覽引一名侯桃一

名房木生川谷

名醫曰九月采實暴乾

案漢書楊雄賦云列新雉於林薄師古云新雉卽辛夷耳爲樹甚大其木枝葉皆芳一名新矧史記司馬相如傳雜以流夷注漢書音義曰流夷新夷也陶弘景云小時氣辛香卽離騷所呼新夷者陳藏器云初發如筆北人呼爲木筆其花最早南人呼爲迎春按唐人名爲玉蕊又曰玉蘭

桑上寄生味苦平主腰痛小兒背強癰腫安胎充肌膚堅髮齒長鬚眉其實明目輕身通神一名寄屑一名寓木一名宛童生川谷

名醫曰一名蔦生弘農桑樹上三月三日采莖陰乾

案說文云蔦寄生也詩曰蔦與女蘿或作槁廣雅云宛童寄生槁也又寄屏寄生也中山經云龍山上多寓木郭璞云寄生也爾雅云寓木宛童郭璞云寄生樹一名蔦毛詩云蔦與女蘿傳云蔦寄生也陸璣云蔦一名寄生葉似當盧子如覆盆子赤黑甜美

杜仲味辛平主腰脊痛補中益精氣堅筋骨強志除陰下痒溼小便餘瀝久服輕身耐老一名思僊生山谷

吳普曰一名杜仲一名木綿一名思仲

御覽

名醫曰一名思仲一名木綿生上虞及上黨漢中二月五月六月九月采皮

案廣雅云杜仲曼榆也博物志云杜仲皮中有絲

折之則見

女貞實味苦平主補中安五藏養精神除百疾久服肥健輕身不老生山谷

名醫曰生武陵立冬采

案說文云楨剛木也東山經云太山上多楨木郭

璞云女楨也葉冬不凋毛詩云南山有杞陸璣云

木杞其樹如樗

陳藏器作栗

一名狗骨理白滑其子爲

木蚩子可合藥司馬相如賦有女貞師古曰女貞

樹冬夏常青未嘗凋落若有節操故以名焉陳藏

器云冬青也

木蘭味苦寒主身大熱在皮膚中去面熱赤炮酒釀

惡風癩疾陰下痒溼明耳目一名林蘭

名醫曰一曰杜蘭皮似桂而香生零陵及太山十

二月采皮陰乾

案廣雅云木欄桂欄也劉逵注蜀都賦云木蘭大樹也葉似長生冬夏榮常以冬華其實如小柿甘美南人以爲梅其皮可食顏師古注漢書云皮似椒而香可作面膏藥

蕤核味甘溫主心腹邪氣明目目赤痛傷淚出久服輕身益氣不飢生川谷

吳普曰蕤核一名萹神農雷公甘平無毒生池澤八月采補中強志明日久服不飢覽御

名醫曰生函谷及巴西

案說文云櫻白櫻棧爾雅云棧白櫻郭璞云櫻小木叢生有刺實如耳璫紫赤可啖一切經音義云本艸作蕤今櫻核是也

橘柚味辛溫主胸中瘦熱逆氣利水穀久服去臭下
氣通神一名橘皮生川谷舊在果部非

名醫曰生南山江南十月采

案說文云橘果出江南柚條也似橙而酢爾雅云
柚條郭璞云似橙實酢生江南禹貢云厥包橘柚
僞孔云大曰橘小曰柚列子湯問篇云吳楚之國
有木焉其名爲櫟碧樹而冬生實丹而味酸食其
皮汁已憤厥之疾司馬相如賦有橘柚張揖曰柚
卽橙也似橘而大味酢皮厚

右木上品二十種舊一十九種攷果部橘柚當入
此

髮髮味苦溫主五癘關格不通利小便水道療小兒
癩大人瘞仍自還神化

案說文云髮根也髮髣也髣髮也或作髣毛詩云不屑髣也箋云髣髮也儀禮云主婦被錫注云被錫讀爲髮髣古者或剔賤者刑者之髮以被婦人之紒爲飾因名髮髣焉李當之云是童男髮据漢人說髮髣當是剃刑人髮或童男髮本經不忍取人髮用之故用剃餘也方家至用天靈蓋害及枯骨卒不能治病古人所無矣

右人一種舊同

龍骨味甘平主心腹鬼注精物老魅欬逆洩利膿血女子漏下癥瘕堅結小兒熱氣驚癩齒主小兒大人驚癩瘖疾狂走心下結氣不能喘息諸瘵殺精物久服輕身通神明延年生山谷

吳普曰龍骨生晉地山谷陰大水所過處是龍死

骨也青白者善十二月采或無時龍骨畏乾漆蜀椒理石龍齒神農李氏大寒治驚癎久服輕身

御覽

大觀本
節文

名醫曰生晉地及太山巖水岸土穴中死龍處采無時

案范子計然云龍骨生河東

麝香味辛温主辟惡氣殺鬼精物温瘡蠱毒癎瘥去三蟲久服除邪不夢寤厭寐生川谷

名醫曰生中臺及益州雍州山中春分取之生者益良

案說文云麝如小麋臍有香黑色麝也

御覽引爾多三字

雅云麝父麝足郭璞云脚似麝有香

牛黃味苦平主驚癎寒熱熱盛狂瘥除邪逐鬼生平

澤

吳普曰牛黃味苦無毒牛出入呻御覽作鳴吼者有之

夜有光御覽作夜視有光走御覽有牛字角中牛死入膽中如

雞子黃後漢書延篤傳注

名醫曰生晉地於牛得之即陰乾百日使時燥無

令見日月光

熊脂味甘微寒主風痺不仁筋急五藏腹中積聚寒

熱羸瘦頭瘍白禿面疢久服強志不飢輕身生山谷

名醫曰生雍州十一月取

案說文云熊獸似豕山居冬蟄

白膠味甘平主傷中勞絕腰痛羸瘦補中益氣婦人

血閉無子止痛安胎久服輕身延年一名鹿角膠

名醫曰生雲中煮鹿角作之

案說文云膠昵也作之以皮考工記云鹿膠青白牛膠火赤鄭云皆謂煮用其皮或用角

阿膠味甘平主心腹內崩勞極灑灑如瘡狀腰腹痛四肢酸疼女子下血安胎久服輕身益氣一名傅致膠

名醫曰生東平郡煮牛皮作之出東阿

案二膠本經不著所出疑本經但作膠名醫增白字阿字分爲二條

右獸上品六種舊同

丹雄雞味甘微温主女人崩中漏下赤白沃補虛温中止血通神殺毒辟不祥頭主殺鬼東門上者尤良肪主耳聾腸主遺溺眊脰裏黃皮主洩利尿白主消渴傷寒寒熱黑雌雞主風寒溼痺五緩六急安胎翮

羽主下血閉雞子主除熱火瘡癩瘰可作虎魄神物
雞白橐肥脂生平澤

吳普曰丹雞卵可作琥珀御覽

名醫曰生朝鮮

案說文云雞知時畜也籀文作雞肪肥也腸大小
腸也臄鳥胫胫鳥胃也鹵糞也翮羽莖也羽鳥長
毛也此作毗省文尿即屨字古文徙亦鹵假音字
也

雁肪味甘平主風攣拘急偏枯氣不通利久服益氣
不飢輕身耐老一名鶩肪生池澤

吳普曰雁肪神農岐伯雷公甘無毒御覽有鶩肪二字當作一

名鶩殺諸石藥毒御覽引云采無時

名醫曰生江南取無時

案說文云雁鵝也驚舒鳧也廣雅云鳴鵝倉鳴雁也鳧驚鴨也爾雅云舒雁鵝郭璞云禮記曰出如舒雁今江東呼鴨又舒鳧驚郭璞云鴨也方言云雁自關而東謂之鳴鵝南楚之外謂之鵝或謂之倉鳴據說文云別有雁以爲鴻雁字無鴨字鴨卽雁之急音此雁肪卽鵝鴨脂也當作雁字名醫不曉別出驚肪條又出白鴨鵝條反疑此爲鴻雁何其謬也陶蘇皆亂之

右禽上品二種舊同

石蜜味甘平主心腹邪氣諸驚癩瘞安五藏諸不足益氣補中止痛解毒除衆病和百藥久服強志輕身不飢不老一名石飴生山谷

吳普曰石蜜神農雷公甘氣平主河源或河梁

御覽

又一引云生
武都山谷

名醫曰生武都河源及諸山石中色白如膏者良
案說文云蠶蠶甘飴也一曰螟子或作蜜中山經
云平逢之山多沙石實惟蜂蜜之廬郭璞云蜜赤
蜂名西京雜記云南越王獻高帝石蜜五斛玉篇
云蠶螽甘飴也蘇恭云當去石字

蜂子味甘平主風頭除蠱毒補虛羸傷中久服令人
光澤好顏色不老大黃蜂子主心腹張滿痛輕身益
氣土蜂子主癰腫一名蜚零生山谷

名醫曰生武都

案說文云蠶飛蟲螫人者古文省作蠶廣雅云蠶
蠶蜂也又土蜂蟻蟪也爾雅云土蠶郭璞云今江
南大蠶在地中作房者爲土蠶啖其子卽馬蠶今

荆巴閒呼爲螿又木蠹郭璞云似土蠹而小在樹上作房江東亦呼爲木蠹又食其子禮記檀弓云范則冠鄭云范蠹也方言云蠹燕趙之間謂之蠹螿其小者謂之蠹螿或謂之蚘蛻其大而蜜謂之壺蠹郭璞云今黑蠹穿竹木作孔亦有蜜者或呼笛師按蠹名爲范者聲相近若司馬相如賦以汜爲楓左傳颯颯卽汎汎也

蜜臘味甘微温主下利膿血補中續絕傷金創益氣不飢耐老生山谷

名醫曰生武都蜜房木石間

案西京雜記云南越王獻高帝蜜燭二百枚玉篇云蠟蜜滓陶弘景云白蠟生於蜜中故謂蜜蠟說文無蠟字張有云臘別蠟非舊作蠟今据改

牡蠣味鹹平主傷寒寒熱溫瘧灑灑驚恚怒氣除拘
緩鼠瘦女子帶下赤白久服強骨節殺邪氣延年一
名蠣蛤生池澤

名醫曰一名牡蛤生東海采無時

案說文云蠣蚌屬似蠓微大出海中今民食之讀
若賴又云蜃屬有三皆生於海蛤厲千歲雀所化
秦謂之牡厲

龜甲味鹹平主漏下赤白破癥瘕瘧疾五痔陰蝕溼
痺四肢重弱小兒顛不合久服輕身不飢一名神屋
生池澤

名醫曰生南海及湖水中采無時

案廣雅云介龜也高誘注淮南云龜殼龜甲也

桑蜱蛸味鹹平主傷中疝瘕陰痿益精生子女子血

閉要痛通五淋利小便水道一名蝕朮生桑枝上采蒸之

吳普曰桑蛸條一名此今本脫此二字蝕朮一名害焦一名

致神農鹹無毒覽御

名醫曰螳螂子也二月三月采火炙

案說文云蟲蟲蛸也或作蜉蛸蟲蛸螳螂子廣雅云螭螭烏洩冒焦螭蛸也爾雅云不過螭螭其子蜉蛸郭璞云一名螭螭螭螭卵也范子計然云螭蛸出三輔上價三百舊作螭聲相近字之誤也玉篇云蜉同螭

海蛤味苦平主欬逆上氣喘息煩滿胸痛寒熱一名魁蛤

吳普曰海蛤神農苦岐伯甘扁鵲鹹大節頭有文

文如磨齒采無時

名醫曰生南海

案說文云蛤蜃屬海蛤者百歲燕所化魁蛤一名復纍老服翼所化爾雅云魁陸郭璞云本艸云魁狀如海蛤圓而厚朴有理縱橫即今之蚶也周禮鼈人供蠹鄭司農云蠹蛤也杜子春云蠹蚌也周書王會云東越海蛤孔鼉云蛤文蛤按名醫別出海蛤條云一名魁陸一名活東非

文蛤主惡瘡蝕

御覽作除陰蝕

五痔

御覽下有大孔出血大觀本作黑字

名醫曰生東海表有文采無時

蠡魚

初學記引作鱧魚

味甘寒主溼痺面目浮腫下大水一

名鮑魚生池澤

名醫曰生九江采無時

案說文云鱻鮓也鮓鱻也讀若綉襪廣雅云鱻鮓
鮓也爾雅云鱻郭璞云鮓也毛詩云魴鱻傳云鱻
鮓也據說文云鱻鱻也與鱻不同而毛萇郭璞以
鮓釋鱻與許不合然初學記引此亦作鱻蓋二字
音同以致譌舛不可得詳廣雅又作鱻亦音之譌
又廣志云豚魚一名鮓御覽更異解也又陸璣云鱻
卽鮓魚也似鱻狹厚今京東人猶呼醴魚又本艸
衍義曰蠡魚今人謂之黑鯉魚道家以爲頭有星
爲厭据此諸說若作鱻字說文所云鮓廣志以爲
江豚本艸衍義以爲黑鯉魚若作鮓字說文又以
爲鱻廣雅以爲鱻鱻陸璣以爲鮓魚說各不同難
以詳究

鯉魚膽味苦寒主目熱赤痛青盲明目久服強悍益

志氣生池澤

名醫曰生九江采無時

案說文云鯉鱣也鱣鯉也爾雅云鯉鱣舍人云鯉一名鱣郭璞注鯉云今赤鯉魚注鱣云大魚似鱣毛詩云鱣鮪發發傳云鱣鯉也据此知郭璞別爲二非矣古今注云兗州人呼赤鯉爲赤驥謂青鯉爲青馬黑鯉爲元駒白鯉爲白騏黃鯉爲黃雉右蟲魚上品一十種舊同

藹實莖味甘平主補中養神益氣力除百疾久服輕身耐老不飢延年一名水芝丹生池澤

名醫曰一名蓮生汝南八月采

案說文云藹夫渠根蓮夫渠之實也茹夫渠莖爾雅云荷芙渠郭璞云別名芙蓉江東呼荷又其莖

茄其實蓮郭璞云蓮謂房也又其根藕

大棗味甘平主心腹邪氣安中養脾助十二經平胃氣通九竅補少氣少津液身中不足大驚四肢重和百藥久服輕身長年葉覆麻黃能令出汗生平澤

吳普曰棗主調中益脾氣令人好顏色美志氣

大觀

本艸引吳氏本艸

名醫曰一名乾棗一名美棗一名良棗八月采生

河東暴乾

案說文云棗羊棗也爾雅云遵羊棗郭璞云實小而圓紫黑色今俗呼之爲羊矢棗又洗大棗郭璞云今河東猗氏縣出大棗子如雞卵

蒲萄味甘平主筋骨溼痺益氣倍力強志今人肥健耐飢忍風寒久食輕身不老延年可作酒生山谷

名醫曰生隴西五原敦煌

案史記大宛列傳云大宛左右以蒲萄爲酒漢使取其實來於是天子始種苜蓿蒲萄肥饒地或疑此本經不合有蒲萄名醫所增當爲黑字然周禮場人云樹之果蓏珍異之物鄭玄云珍異葡萄杷杷之屬則古中國本有此大宛種類殊常故漢特取來植之舊作葡据史記作蒲

蓬蘽味酸平主安五藏益精氣長陰令堅強志倍力有子久服輕身不老一名覆盆生平澤

吳普曰缺盆一名決盆

御覽

甄氏本艸曰覆蓋子一

名馬瘦一名陸荆

上同

名醫曰一名陸蘘一名陰藥生荆山及冤句

案說文云蘘木也莖缺盆也廣雅云莖盆陸英莓

也爾雅云萑蒺益郭璞云覆盆也實似莓而小亦可食毛詩云葛藟纍之陸璣云一名巨瓜似燕藁亦連蔓葉似艾白色其子赤可食列僊傳云昌容食蓬藁根李當之云卽是人所食莓陶弘景云蓬藁是根名覆盆是實名

雞頭實味甘平主溼痺腰脊痠痛補中除暴疾益精氣強志令耳目聰明久服輕身不飢耐老神僊一名雁喙實生池澤

名醫曰一名芡生雷澤八月采

案說文云芡雞頭也廣雅云菝芡雞頭也周禮籩人加籩之實芡鄭玄云芡雞頭也方言云菝芡雞頭也北燕謂之菝青徐淮泗之間謂之芡南楚江湘之間謂之雞頭或謂之雁頭或謂之烏頭淮南

子說山川云雞頭已瘦高誘云水中芡幽州謂之雁頭古今注云葉似荷而大葉上蹙縐如沸實有芒刺其中有米可以度飢卽今蕎子也

右果上品五種舊六種今以橘柚入木

胡麻味甘平主傷中虛羸補五內御覽作藏益氣力長肌

肉填髓腦久服輕身不老一名巨勝葉名青囊生川澤

吳普曰胡麻一名方金神農雷公甘無毒一名狗蝨立秋采

名醫曰一名狗蝨一名方莖一名鴻藏生上黨

案廣雅云狗蝨巨勝藤菰胡麻也孝經援神契云鉅勝延年宋均云世以鉅勝爲苟杞子陶弘景云本生大宛故曰胡麻

按本經已有此陶說非也且與麻蕒並列胡之言
大或以葉大於麻故名之

麻蕒味辛平主五勞七傷利五藏下血寒氣多食令人見鬼狂走久服通神明輕身一名麻勃麻子味甘平主補中益氣肥健不老神僊生川谷

吳普曰麻子中仁神農岐伯辛雷公扁鵲無毒不欲牡厲白薇先藏地中者食殺人麻藍一名麻蕒一名青欲一名青葛神農辛岐伯有毒雷公甘畏牡厲白薇葉上有毒食殺人麻勃一名麻花雷公辛無毒畏牡厲

御覽

名醫曰麻勃此麻花上勃勃者七月七日采良子
九月采生太山

案說文云麻與林同人所治在屋下桌麻也施桌

實也或作𦉰苧麻母也莫苧也以蕒爲雜香艸爾雅云𦉰臬實臬麻孫炎云𦉰麻子也郭璞云別二名又苧麻母郭璞云苴麻盛子者周禮籩朝事之籩其實𦉰𦉰鄭云𦉰臬實也鄭司農云麻實曰𦉰淮南子齊俗訓云胡人見𦉰不知其可以爲布高誘云𦉰麻實也据此則弘景以爲牡麻無實非也唐本以爲麻實是

右米穀上品二種舊三種今以青蘘入艸

冬葵子味甘寒主五藏六府寒熱羸瘦五癢利小便久服堅骨長肌肉輕身延年

名醫曰生少室山十二月采之

案說文云𦉰古文終葵菜也廣雅云𦉰葵也攷𦉰與終形相近當卽爾雅終葵爾雅云終葵繁露郭

璞云承露也大莖小葉華紫黃色本艸圖經云吳人呼爲繁露俗呼胡燕支子可婦人塗面及作口脂按名醫別有落葵條一名繁露亦非也陶弘景以爲終冬至春作子謂之冬葵不經甚矣

萹實味甘寒主青盲明目除邪利大小便去寒熱久服益氣力不飢輕身一名馬萹

名醫曰一名莫實生淮陽及田中葉如藍十一月采

案說文云萹萹菜也爾雅云蕘赤萹郭璞云今萹菜之赤莖者李當之云萹實當是今白萹唐本注云赤萹一名蘘今名莫實字誤

瓜蒂味苦寒主大水身面四肢浮腫下水殺蠱毒效逆上氣及食諸果病在胸腹中皆吐下之生平澤

名醫曰生嵩高七月七日采陰乾

案說文云瓜瓠也象形蒂瓜當也廣雅云水芝瓜也陶弘景云甜瓜蒂也

瓜子味甘平主令人悅澤好顏色益氣不飢久服輕

身耐老一名水芝御覽作土芝生平澤

吳普曰瓜子一名瓣七月七日采可作面脂御覽

名醫曰一名白瓜子生嵩高冬瓜仁也八月采

案說文云瓣瓜中實廣雅云冬瓜菰也其子謂之

瓢陶弘景云白當為甘舊有白字据名醫云一名

白瓜子則本名當無

苦菜味苦寒主五藏邪氣厭穀胃痹久服安心益氣

聰察少臥輕身耐老一名茶艸一名選生川谷

名醫曰一名游冬生益州山陵道旁凌冬不死三

月三日采陰乾

案說文云荼苦菜也廣雅云游冬苦菜也爾雅云
荼苦菜又檟苦荼郭璞云樹小如梔子冬生葉可
煮作羹今呼早采者爲荼晚取者爲茗一名薺蜀
人名之苦菜陶弘景云此卽是今茗茗一名荼又
令人不眠亦凌冬不凋而兼其止生益州唐本注
駁之非矣選與薺音相近

右菜上品五種舊同

本艸經卷一